

Okpume Chiokike kpumennu Joni

Nhne gbasiri okwukwo ka

Okwukwo ka neegesi nhne Joni whnurnu gbasiri izi Chiokike nu nhne Jizosi Karaisi mernu (1:2). Izi ka waru ngalaba eto. (1) Rikne ojo nornu ernu n'owa, nye Karaisi jaata awhnwhnu, nwu masi. (2) Jizosi bu Nyenwe ai, o jeemegbu kpakara ele badnu nu kpakara rikne ke neemegidne Chiokike. (3) Chiokike nwernu ogwo ernu ke o bitannu kpakara ele ke a, ele kwesiri be kwnata be mkpoma, ele dazigidnenu n'okwnata ovu be, ke kakwo ele nwurnu n'ernu Nyenwe ai.

Ka bu izi ke nwernu olile anya nyee ele Karaisi, ele taru awhnwhnu, nwu kwnornu okwnata mkpoma be nu Karaisi. Okwukwo izi ka nookwu nu o bu n'ezi nu ochichi aka rikne ele Rom zi naakpa rikne, kovu Nnwọ Atnurnu Chiokike nwe omegbu n'ipne-aznu. Ka mernu be buru ele kwesiri okwnata ovu du n'enwu.

Nhne zi n'okwukwo ka

Ohnurninya Joni (1:1-8)

Nyenwe ai zi budnu (1:9-20)

Okwukwo izi ogbako Chiokike esau (2:1---3:22)

Okpukpe n'oligwe (4:1-11)

Okwukwo ke nwernu akara esau (5:1---6:17)

Okpukpe nu ruwhnu ngadna eze Chiokike (7:1-17)

Okwodu esau (8:1---11:19)

Agwọ nụ anọhia lawuru wam (12:1---13:18)
 Ikpe Chiokike nụ ochekwa a (14:1---15:8)
 Okiko oву owe ẹhni Chiokike (16:1-21)
 Be megburu ele irno Chiokike (17:1---20:10)
 Ikpe ipne-aznụ (20:11-15)
 Oligwe ikne nụ ọwa ikne (21:1-8)
 Jeruselem ikne (21:9---22:6)
 Karaịsi jaava wara wara (22:7-21)

¹ Okpume Jizọsi Karaịsi, ke Chiokike nyernu a, ma o gesi ele izi a nhne jeeme n'ige matị ke vazne, o zizne enine izi a o gesi nye izi a Jọni.

² Jọni gbarụ akebne ikwu-ọnu Chiokike nụ akebne Jizọsi Karaịsi, o kwuru kpakara nhne ọ whnuru.

³ Nye ọwa ọma bụ nye nọogwnu kpakara ikwu-ọnu ke ọkwukwo ọwhnurninya ka, nụ ele nurnu be, bita masị be, kwnornu nụ ige zị ndundu.

Obekwu ikwu

⁴ Mawa, Jọni naagbaznenu ọgbako Chiokike ẹsau ke zị n'Esia ọkwukwo.

Oru nụ udno ke Chiokike nye zị, nye zị nụ mbom, nụ nye ke jaava dazinu anụ, hite n'aka enine ẹsau ke zị nụ ruwhnu ngadna eze a,

⁵ ma n'aka Jizọsi Karaịsi, nye akebne kwesiri be kwnata a mkpoma, nye mbom ke hi n'ẹnwu lizo, nye ke neechi ele eze k'owa.

Nye whnuru ai n'anya, gweru ọvnarna a snusnama kpakara mmehie ai,

⁶ o mee ai a buru mbam ele ọkwa ariohna Chiokike a, nụ Nda a, igwugwu nụ rikne zinu a hite kịtna dụ n'ige kwó okwo. Amim.

⁷ Le, ọ vawa nụ rime erumeru oligwe,

kpakara anya j̄owhnu a,
 ma ele d̄uru a ara,
 kpakara ele z̄i n'owa jaagbanu a mkpe.
 Owe! Amim.

⁸ “Mawa bu Alifa nu Omega,” bu nhne Nyenwe āi kwuru. “Mawa bu Opanizo nu Okwukwo, nye z̄i, nye z̄i nu mbom, nu nye jaava, Nye Meli Nhne Dum.”

*Nye nu lele
 Nnwọ ke Badnu*

⁹ Mawa bu J̄oni, nye bu nnwọ nda anu, nye sno anu nu rime awhnuwhnu, a bu ele eli-eze a, a naagidne awhnuwhnu. Be kwuznenu m nu rime eli ōhia esilawuru osimini ke Patimosi, kwnornu nu m kp̄oru m okwo ikwu-onu Chiokike nu nhne Jizosi gbaru ama a.

¹⁰ M z̄i m nu rime Enine n'obochi Nyenwe āi, m n̄urnu m okne nkoli n'aznu m ke dnarnu lele okwodu.

¹¹ Nkoli ka kaa, “Gbasi nhne i whnurnu n'okwukwo, ziznenu a ōgbako Chiokike esau ka, ziznenu Efesosi, nu S̄imaina, ziznenu Pegamosi, nu Tāitira, ziznenu Sadisi, nu Filadefia, zizne masinu Laodisia.”

¹² M tuhna ma m whnurnu m nye nookwunu m oka. M whnurnu m nhne be tukwasi tonji esau be wuru golu.

¹³ N'esilawuru nhne be tukwasi tonji esau wam gwuzo otu nye nu lele Nnwọ ke Badnu. O wogwu iwo awura d̄uru a eli ōchi, o ji ajni su nu mkpoma a.

¹⁴ Risi a nu rukeri-ize a noonwu va-a-a lele wulu, naachna va-a-a lele mkpuru-mini, anya a nu lele riro bekwnu.

15 Ọchi a lawuru nụ lele ọla be gbarụ bẹkwu nụ rime ite bẹkwu, nkọli a naadna lele agida mini.

16 O ji mbọ ẹsau n'akarikwnunga a, ama-ogwnu nwernu ruwhnu lawuru tuga buko neehi n'ọnu a nọowhuya, ruwhnu a noonwu lele ẹnam n'esilawuru iwhnehnne.

17 Nga me whuru a, m dna n'ẹli n'ọchi a lele nye nwuru ọnu. Kọvu ọ tukurwasiri m akarikwnunga a, kaa, “Ogwnu tuko i, mawa bu Nye Mbom nụ Nye Ipne-aznu.

18 M zi m budnu. M nwuru m ẹnu, kọvu le, m zi m budnu tim tom. M ji m snambi ẹnu nụ ẹli renwu.

19 “Gbasị nhne i whuru n'okwu-kwo, nhne zi kitna, nụ nhne jeeme nụ ruwhnu.

20 Ka bu nhne miri emi ke mbọ ẹsau wam i whuru n'akarikwnunga m, nụ nhne be tukwasi tonji ẹsau wam be wuru golu. Mbọ ẹsau wam bu enine izi ogbako Chiokike ẹsau, nhne be tukwasi tonji ẹsau wam i whuru bu ogbako ẹsau.”

2

Izi ele Efesosi

1 Gbaznenu enine izi ke ogbako Chiokike ke zi n'Efesosi okwukwo: Hite n'ọnu nye wam ji mbọ ẹsau wam n'akarikwnunga a, nye neezne izne n'esilawuru nhne be tukwasi tonji ẹsau wam.

2 M magwu m nhne anu neeme. Anu nọdogbu ẹni anu n'enu nụ ọnuta mkpoma anu. Anu kwéle o kwubnanya ele aruru-ẹli, anu kparu ele kwuru ẹni be ele izi iru, kọvu be buo, anu whuru nụ be bu ele aghalaghala.

³ Anụ jiri ọsuta mkpoma nagidne awghnuwhnu anụ taru kwnornu rewhna m, anụ kwéle rikne gwu anụ.

⁴ Kọvu m nwernu m otu nhne megidne anụ, anụ zíma n'ọwhnun'anya lele kpa anụ neeme nụ mbom.

⁵ Anụ chenwanya hne anụ dnarnu. Anụ hi nụ mmehie anụ tũhnasna, rnụ ọrnụ mbom anụ rnurnu. O buru nụ anụ jọtuhnasna hite nụ mmehie anụ, m jaavakwnusi anụ wara wara, gweme nhne be tũkwasi tọnji anụ nụ hne ọ zị, okwolem ma anụ tũhnasnarnu.

⁶ Kọvu anụ nwernu otu nhne buru ọma, anụ sno ọrnụ ele Nikolata irno lele kpa me snornu a irno.

⁷ Nye nwernu nsni, ọ nurnu nhne Enine Nso naakanu kpakara ọgbako Chiokike. Nye megburu, m jeenye a rikne o ri mkpuru isisi ke budnu ke zị n'obna Chiokike.

Izi ele Sımaina

⁸ Gbaznenu enine izi ke ọgbako Chiokike ke zị nụ Sımaina okwukwo: Hite n'ọnu nye wam bu Nye Mbom nụ Nye Ipne-aznu, nye nwurnu, ziri kwno budnu.

⁹ M magwu m awghnuwhnu anụ naata. M magwu m nụ anụ bu ele mboni, kọvu anụ bu ele nwernu ẹkwnu k'agida. M magwu m oka ojo ele ka nụ be bu ele Ju nookwugidne anụ, kọvu be buo, be bu ele oro ọgbako Setani.

¹⁰ Ogwnu tũko anụ kwnornu awghnuwhnu anụ jaata. Le Setani jeeyisi agwna anụ n'ikelu ma be kpa anụ iru. Anụ jeenwe okpagbu nri obochi. Anụ buru ele kwesiri okwnata mkpoma du n'ẹnwu, m jeenye anụ okpu-eze ke bu budnu.

11 Nye nwernu nsni, o nurnu nhne Enine Nso naakanu kpakara ogbako Chiokike. Nye megburu, enwu ke ebo jooogu a.

Izi ele Pegamosi

12 Gbaznenu enine izi ke ogbako Chiokike ke zi nu Pegamosi okwukwo:

Hite n'onu nye wam nwernu ama-ogwnu ke nwernu ruwhnu lawuru zi buko.

13 M magwu m hne anu wu bu hne ngadna Setani zi. Anu jidnesiri rewhna m rikne, anu tuwhule okwnata mkpoma anu nu hne me zi, o bubedi nga be gburu Antipasi nye akebe m nye kwesiri okwnata mkpoma n'esilawuru anu hne Setani wu.

14 Kovu m nwernu m nhne ele nu ele megidne anu. Agwna ele noosno iznizni Balam nye znirni Balaki kpa o jeeme rumu Izireli mmehie hite n'ori nhne be jiri kwanu renwu ariohna nu hite n'ome oyi.

15 Agwna ele noosno iznizni ele Nikolata zi masi n'esilawuru anu.

16 Anu hi nu mmehie tuhna, o buo kpa, m jaavakwnusi anu wara wara, gweru ama-ogwnu hi n'onu m whuya lusi ele ka ogwnu.

17 Nye nwernu nsni, o nurnu nhne Enine Nso naakanu kpakara ogbako Chiokike. Nye megburu, m jeenye a agwna mana ke tugwaru otugwa. M jeenye masi a otu akaworugwu abochna ke be gbakwasiri rewhna ikne n'olu a, o za nye berere marnu a, okwolem nye wam naharu a.

Izi ele Taitira

18 Gbaznenu enine izi ke ogbako Chiokike ke zi nu Taitira okwukwo: Ka bu nhne Nnwọ Chiokike

kwuru, nye wam anya a lawuru nụ lele bẹkwu, nye ọchi a lawuru noonwu lele ọla chnarnu achna.

¹⁹ M magwu m nhne anu neeme. M magwu m ọwhnun'anya anu, nu ọkwata mkpoma anu, nu izi anu, nu ọsnuta mkpoma anu. M magwu m masi nu ọnu anu kitna kakwo ke mbom.

²⁰ Kọvu m nwernu otu nhne megidne anu. Anu gharuru nwerinya wam bu Jezibeli n'esilawuru anu. Nwerinya ka kwuru ọni a nye ọwhnurninya Chiokike, neezni ele izi m kpa be mee ọyi, nu o ri nhne be jiri kwa renwu, nooduhie ele badnu.

²¹ M nyernu m a ige ma ọ tūnasna nu mmehie ome ọyi, o kwéle.

²² Le, m jootubna n'okpata ya nu ele ọyi a, be jaata awnūwhnu k'agida, okwolem ma be tūnasnarnu hite nu nhne ojo be mūhiaru n'aka a.

²³ M joogbu rumu a, ma kpakara ọgbako Chiokike mahia nu mawa bu nye wam noonyosna mkpoma nu echiche ke rumu badnu. M jọkwuhnasi nye ọbula lele kpa ọnu a jiri ziri.

²⁴ Kọvu agwna anu gwnarnu nu Taıtira, ele snoge iznizni ojo ka, ele ma nhne be nookwu nhne tugwaru otugwa ke Setani, m jeenye anu ivu runa berere.

²⁵ Kọvu anu jidnesi rikne nhne anu ji tem m va.

²⁶ Nye megburu, bita ikwu-onu m du okwukwo, m jeenye a rikne hne kpakara mba zi.

²⁷ O jeeji mkpara rugwe neechi be,

ọ jeeliwa be lele kpa be liwa itechi,

²⁸ lele kpa me nahiaru iknernema n'aka Nda m. M jeenye a mbo ọsisi.

²⁹ Nye nwernu nsni, ọ nurnu nhne Enine Nso naakanu kpakara ọgbako Chiokike.

3

Izi ele Sadisi

¹ Gbaznenu enine izi ke ọgbako Chiokike ke zị Sadisi ọkwukwo: Ka bụ nhne nye wam ji enine ẹsau Chiokike n'aka a, nụ mbo ẹsau. M magwu m nhne anụ neeme. M magwu m nụ anụ nwernu ẹwhna nụ anụ zị bụdnu, kọvu anụ nwurnu ọnwu.

² Anụ tnenya, jikwasi nhne ke gwnarnụ matị ọ nwụ rikne, kwnornu nụ m whnuge m ẹnu anụ ke zuru ozu nụ ruwhnu Chiokike m.

³ Anụ chenwanya nhne anụ nahiaru, ke anụ nurnu, anụ mee be. Anụ hi nụ mmehie anụ tūhnasna. Ọ bụru nụ anụ jéetnenya, m jaavakwnusi anụ lele nye buznu, anụ jáamahia ige me jaava.

⁴ Kọvu anụ nwernu badnụ ele nụ ele nụ Sadisi ele mérula awura be. Be joowo awura abọchna snornu m zne izne kwnornu nụ be kwesiri.

⁵ Nye megburu kpa, be joowote a awura abọchna, m jóokwnome ẹwhna a n'ọkwukwo ke bụdnu. M jookwuhia ẹwhna a nụ ruwhnu Nda m ya nụ ruwhnu ele enine izi a.

⁶ Nye nwernu nsni, ọ nurnu nhne Enine Nso naakanụ kpakara ọgbako Chiokike.

Izi ele Filadefia

⁷ Gbaznenu enine izi ke ọgbako Chiokike ke zị nụ Filadefia ọkwukwo: Ka bụ nhne nye wam zị nsọ nụ nye ezi ọka kwuru, nye jigwu snambị Devidi, nye ọ bụru nụ ọ gbama ọnuhna, ọ zá nye nwernu rikne ọ gbasni a, nye gbasni ọnuhna, ọ zá nye nwernu rikne ọ gbama a.

⁸ M magwu m nhne anụ neeme. Le, m gba-mannụ m anụ ọnuhna ke ọ zá nye nwernu rikne

gbasni, kwnornu nụ anụ nwernu iknernema matị, kovu anụ bitaru ikwu-ọnu m, anụ gónahorula rẹwhna m.

⁹ Anụ jọowhnu nhne me jeeme ele ọro ọgbako Setani, ele ka nụ be bụ ele Ju, kovu be búo, be bụ ele aghalaghala, m jeeme be va dna n'ẹli n'ọchi anụ, be jaamahia nụ m whnurnu m anụ n'anya.

¹⁰ Kwnornu nụ anụ bitaru ikwu-ọnu m, snuta ovu, m jaabita masị anụ n'ige ọrnurna ke jaadnakwasị kpakara ọwa, ọ rna ele wu n'ọwa ọrnurna.

¹¹ Le, m vawa wara wara, anụ jidnesi nhne anụ ji rikne, ọ zị nye berere nahọru anụ okpu-eze anụ.

¹² Nye megburu, m jeeme a nsnusnu Ọro Nso Chiokike m. O jéhi nụ rime a whọga berere. M jaagbakwasị rẹwhna Chiokike m n'olu a, ya nụ rẹwhna ọhna ikne Chiokike m, ke bụ Jeruselem ikne, ke hi n'oligwe n'aka Chiokike m hiedna. M jaagbakwasị a rẹwhna ikne m n'olu a.

¹³ Nye nwernu nsni, ọ nurnu nhne Enine Nso naakanụ kpakara ọgbako Chiokike.

Izi ele Laodisia

¹⁴ Gbaznenu enine izi ke ọgbako Chiokike ke zị nụ Laodisia ọkwukwo: Ka bụ nhne Amim kwuru, nye akebne kwesiri be kwnata a mkpoma nụ nye ezi ọka, nye nẹchi kpakara nhne Chiokike keru.

¹⁵ M magwu m nhne anụ neeme. Anụ kpéle bẹkwnu, anụ jila iyi. Ọ jọoburu ọma nụ anụ kperu bẹkwnu mọbu nụ anụ jiri iyi.

¹⁶ Kovu kwnornu nụ anụ zị marna marna, anụ kpéle bẹkwnu, anụ jila iyi, m jọogbohala anụ n'ọnu m.

¹⁷ Anụ kwuru, “M baru m eze, m nwernu m ẹkwnu, ọ zá nhne naara m,” kovu nụ anụ máa nụ

anụ bu ele nọowhnuji anya, nụ ele be kwesiri o dọnu obirizi, ele mboni, ele isni nụ ele gba ẹto.

¹⁸ Me zni anụ ezni, anụ zūnahoru m golu be snurnu, ma anụ nwernu ẹkwnu, nụ awura abọchna, ma anụ kpusni ẹto anụ gbagwū, tna ẹgwnumisi n'anya anụ ma anụ whnurnu ọsno.

¹⁹ M neebigbọ kpakara ele me whnurnu n'anya, naapnịa masị be nhne. Anụ gbalị tūhnasna, hi nū mmehie whụya.

²⁰ Le, m gwuzogwu m n'ọnuhna, nooznu aka. Nye ọbula ke nurnu nkọli m, gbama ọnuhna, m jaabnazne n'oro a, snornu a ri wiri, ya snornu m masị ri wiri.

²¹ Nye megburu, m jeenye a rikne o snornu m daziri ẹli nū ngadna eze m, lele kpa me megburu, m snornu Nda m daziri ẹli nū ngadna eze a.

²² Nye nwernu nsni, ọ nurnu nhne Enine Nso naakanụ kpakara ọgbako Chiokike.

4

Ngadna eze ke zị n'oligwe

¹ Nga nhne ka mekworu, m whnurnu m, le, otu ọnuhna gbamarnū n'oligwe. Nkọli wam me nurnu nū mbom ke dnarnū lele ọkwodu karū, “Vaa hna, m jeegesi i nhne jeemeriri nū ruwhnu.”

² Ngangam, m zị m n'Enine, m whnurnu m nū rime oligwe otu ngadna eze nū nye dazị n'olu a.

³ Nye wam dazị nū ngadna eze wam, ruwhnu a noogbu marna marna lele akaworugwu jasipa nū sadisi, eke nū egwurugwu hnirni ngadna eze wam gburugburu ke naachna lele emiradi.

⁴ Nri ngadna eze lawuru nụ ẹno berere gbarụ ngadna eze wam gburugburu, ele okno badnụ nri lawuru nụ ẹno dazị n'olu ngadna eze berere wam woru awura abọchna, kpuru okpu-eze golu nụ risi be.

⁵ Amuma nụ egbe oligwe nụ ọdidna hi nụ ngadna eze wam naadna. Tọnji ẹsau zị nụ ruwhnu ngadna eze wam noonwu bẹkwnu, ke bụ enine ẹsau wam Chiokike.

⁶ Osimini nụ lele nyno nọowhnu ọsno zị nụ ruwhnu ngadna eze wam.

N'esilawuru ngadna eze wam ya nụ gburugburu a bụ nhne ẹno zị bụdnu bụ anya anya ruwhnu nụ aznụ zị.

⁷ Nhne ke mbom nụ lele odum, ke ẹbo nụ lele nnwọ ehni, ke ẹto nwernu ruwhnu lele ruwhnu badnụ, ke ẹno nụ lele igno neewhe ewhe.

⁸ Nhne zị bụdnu ẹno wam, ke ọbula nwernu akankwu isunu, kpakara ehni be bụ anya anya. Be kpúsnì ọnu be iwhnehnìe nụ abalì, be nọogwnu eri naakaa,

“Nsọ, nsọ, nsọ

bụ Nyenwe aị Chiokike ke Meli Nhne Dum,
Nye zị nụ mbom, nye zị kịtna, nye jaava.”

⁹ Kpa nhne wam zị bụdnu zị neenye a igwugwu nụ ọson'anya, nọotunu nye wam dazigwu nụ ngadna eze wam mmamma, nye zị bụdnu ọkwnukokwnu,

¹⁰ ele okno badnụ nri lawuru nụ ẹno wam dna n'ẹli nụ ruwhnu nye wam dazigwu nụ ngadna eze, kpọ risi ẹli nụ ruwhnu nye wam zị bụdnu ọkwnukokwnu. Be tūbita okpu-eze be nụ ruwhnu ngadna eze wam, kaa,

¹¹ “Ì bụ nye kwesiri, Nyenwe aị Chiokike,

ọ nahọru igwugwu nụ ọson'anya, nụ ikn-
ernema,
kwnornu nụ ọ bụ jịwa keru kpakara nhne hite nụ
echiche i,
jị nyernu be bụdnu.”

5

Ọkwukwo nụ Nnwọ Atnurnu wam

¹ M whnurnu m otu ọkwukwo n'akarikwnunga
nye wam dazị nụ ngadna eze wam, be gbarụ a
nhne ruwhnu nụ aznụ, be kasiri a akara ẹsau.

² M whnurnu m otu enine izi nwernu rikne ji
okno nkọli neesi okokoba, naakaa, “Ndaa nye kwe-
siri ọ gbaji akara ẹsau wam nụ o kpume ọkwukwo
wam?”

³ Kọvu ọ zá nye be whnurnu n'oligwe nụ ọwa
mọbu nụ mkpururu ọwa, bụ nye kwesiri o kpume
ọkwukwo wam mọbu lebna anya nụ rime a.

⁴ M kwna ẹkwna k'agida kwnornu nụ ọ zá nye
be whnurnu kwesiri o kpume ọkwukwo wam mọbu
lebna anya nụ rime a.

⁵ Otu nụ rime ele okno badnụ wam kanụ m,
“Ị kwnáma ẹkwna, le, Odum ke ẹbnurnu Juda,*
Mgbarẹgwnugwnu Devidi,† o megbulem, o nwernu
rikne o kpume ọkwukwo wam, nụ ọ tọma akara ẹsau
wam.”

⁶ Ige wam m whnurnu m otu Nnwọ Atnurnu
gwuzo n'esilawuru ngadna eze wam, ma nụ es-
ilawuru nhne ẹno wam zị bụdnu ya nụ ele okno
badnụ wam, lele nụ be gburu a ogbu. O nwernu

* 5:5 Odum ke ẹbnurnu Juda Jenesis 49:9 † 5:5 Mgbarẹgwnugwnu
Devidi Azaya 11:1, 10

mfu esau, nụ anya esau ke bụ enine esau wam Chiokike, ke o zihalaru nụ rime kpakara ọwa.

⁷ Nnwọ Atnuru wam zne nahoru nye wam dazi nụ ngadna eze wam okwukwo n'akarikwnunga a.

⁸ Nga ọ nahoruru a okwukwo wam, nhne eno wam zi budnu nụ ele okno badnu nri lawuru nụ eno wam dna n'eli nụ ruwhnu Nnwọ Atnuru wam, kpakara be ji obo be n'aka, ya nụ obele golu ke isensi jiharu, ke bụ okpukpe ele nsọ.

⁹ Be gwnu eri ikne,

“I kwesiri ọ nahoru okwukwo wam,

nụ ọ tọma akara a,

kwnornu nụ be gburu i,

i gweru ọvnarna i gbahia ele ke Chiokike

hite nụ kpakara eburnu, nụ ikwu-onu, hite nụ

mba nụ ele badnu.

¹⁰ I mernu be buru mbam ele okwa ariohna, ke jeekpenu Chiokike,

be jọobu ele eze nechi ọwa.”

¹¹ M le anya, m nuru m nkoli agida enine izi gbaru ngadna eze wam gburugburu, nụ nhne eno wam zi budnu nụ ele okno badnu, pokwu nụ pokwu nụ pokwu ndasi, nụ pokwu ndasi nụ ndasi.

¹² Be ọogwnu eri nụ okno nkoli, naakaa,

“Nnwọ Atnuru wam be gburu kwesiri

ọ nahoru rikne, nụ ekwnu nụ akoniche, nụ ikn-ernema

nụ ọson'anya nụ igwugwu, nụ ọznarni.”

¹³ M nuru m hne kpakara nhne zi budnu zi n'oligwe, n'owa, nụ mkpururu ọwa, kpakara nhne zi budnu ke zi n'okno osimini nụ kpakara nhne zi nụ rime be, naakaa,

“Ọznarni nụ ọson'anya nụ igwugwu nụ rikne zinu

nye wam dazị nụ ngadna eze, ya nụ Nnwọ
Atnụrnu wam tim tọm.”

¹⁴ Nhne ẹno wam zị bụdnu, kaa, “Amim.” Ele okno badnụ wam dna n'eli, kpọnu Chiokike nụ Nnwọ Atnụrnu risi ẹli.

6

Akara ẹsaw wam

¹ M whnụrnu m nga Nnwọ Atnụrnu wam tọmarnu akara ke mbọm. Otu nhne zị bụdnu ẹno wam ji nkọli dnarnụ lele egbe oligwe kaa, “Vaa.”

² M le anya, le otu iyinya rịchna, nye gbagwụ a ji otu mgbata, be nyee a okpu-eze, ọ whọga nọolugbu, neemegbu.

³ Nnwọ Atnụrnu wam tọma akara ke ẹbo, m nurnu m nhne ẹno wam zị bụdnu ke ẹbo, naakaa, “Vaa.”

⁴ Le, iyinya berere naachna ihie ihie, be nyernu nye gbagwụ a rikne o gweme udno n'owa, mee ele badnụ noogbu ibne be, be nyernu a ama-ogwnu hna ezi.

⁵ Nga Nnwọ Atnụrnu wam tọmarnu akara ke ẹto, m nurnu m hne nhne ẹno wam zị bụdnu ẹto karu, “Vaa.” M le anya whnụ iyinya neeji riji, nye gbagwụ a ji nhne be nọotu nhne n'aka a.

⁶ M nurnu m nkọli n'esilawuru nhne ẹno wam zị bụdnu, naakaa, “Otu ntutu ikpa wheti bu ogwo ẹrnu otu obochi, ntutu ikpa bali ẹto ogwo ẹrnu otu obochi. Kọvu anụ lulu mọno olivu nụ manya vaiini.”

⁷ Nnwọ Atnụrnu wam tọma akara k'eno, m nurnu m nkọli nhne zị bụdnu k'eno karu, “Vaa.”

⁸ M le anya, otu iyinya ogbu-nụ-orio, rẹwhna nye dazị n'olu a bu Ẹnwu, Ẹli Rẹnwu sno a n'aznụ. Be

nyernu a rikne hne otu nga nū nga ẹno ke ọwa zị, ma o gweru ama-ọgwnu nū ọkwnunyo gbu be, ma nrịria ojo nū ojo anọhia ke ọwa.

⁹ Nnwọ Atnụrnu wam tọmarnu akara ke isne, m whnụrnu m mkpuru ovu kpakara ele be gburu kwnornu ikwu-ọnu Chiokike nū ama be gbarū nū mkpururu ojo ariọhna.

¹⁰ Be ji okne nkọli neesi okokoba, naakaa, “Nyenwe aị zị nsọ, ị bụ ezi, dū ngele, hne i jeekpe ele zị n'ọwa ikpe, megwnahia ọvnarna aị?”

¹¹ Be nyernu nye ọbula nū rime be iwo awura abọchna, be kanū be, be zukwaru inwe ige maị, tem ọnu ọgwnugwnu ele izi ibne be nū rụmu nda be, ele be joogbu zute.

¹² Nnwọ Atnụrnu wam tọmarnu akara ke isunu, okne ẹli otne enye dnarnū, ẹnam ji riji lele ikpe mkpe, ẹnwa chna ihie ihie lele ọvnarna.

¹³ Mbọ hi n'oligwe naadna n'ọwa lele ike isisi be kwu figi chná achna naadna nga ruwhere nee-whe.

¹⁴ Be pịakota oligwe lele ọkwukwo, rugwu nū ẹli ọhia esilawuru whọga n'ọnodi be.

¹⁵ Ele eze ke ọwa nū ele dikne, ele nẹchi ele ọgwnu ele barū eze, ele dimkpa, nye ọbula, ma ọhi ma nye nwernu ẹhni a, tugwa nū rime ọgba nū iketa rugwu.

¹⁶ Be kanū rugwu kwu nū rugwu maị, “Dnagidne aị, kpusni aị n'anya nye wam dazị nū ngadna eze, ya nū ovu owe ẹhni Nnwọ Atnụrnu wam.

¹⁷ Kwnornu nū okne ọbochi ovu owe ẹhni be valẹm. Nyele joogwuzoli?”

7

Be karu 144,000 ele badnu

akara

¹ Nga nhne ka whemernu, m whnurnu m enine izi eno gwuzo nu ngeri eno ke owa, knernu ruwhere k'owa n'aka, ma ruwhere gharu o whe n'owa, ma n'osimini mabu n'olu isisi obula.

² M whnurnu m enine izi berere hi n'obosi ehnam n'owhuya, o ji akara Chiokike ke zi budnu n'aka a, o ji okne nkoli naakanu ele enine izi eno wam Chiokike nyernu rikne o lulu owa nu osimini,

³ kaa, "Anu lulu owa, mabu osimini, mabu isisi, tem a ka ele izi Chiokike akara n'egedege ruwhnu be."

⁴ M nurnu m onu ogwnugwnu ele be karu akara n'egedege ruwhnu be, be bu otu riwhu nu nri eno nu pokwu eno, hite nu kpakara eburnu Izireli.

⁵ Be bu hite nu eburnu Juda, nri nu pokwu lawuru, eburnu Rubeni, nri nu pokwu lawuru, eburnu Gadi, nri nu pokwu lawuru,

⁶ hite nu eburnu Asa, nri nu pokwu lawuru, eburnu Nafitali, nri nu pokwu lawuru, eburnu Manase, nri nu pokwu lawuru,

⁷ hite nu eburnu Simioni, nri nu pokwu lawuru, eburnu Livai, nri nu pokwu lawuru, eburnu Isaka, nri nu pokwu lawuru,

⁸ hite nu eburnu Zebuloni, nri nu pokwu lawuru, eburnu Josefu, nri nu pokwu lawuru, eburnu Benjamini, nri nu pokwu lawuru.

Igbudu ele badnu wam

⁹ Nga nhne ka mekworu, m le anya whnu igbudu badnu o za nye nwernu rikne gwnuli onu.

Be hi nụ kpakara mba nụ ẹbnurnu, nụ ẹli, nụ ikwu-
onu va, be gwuzoru nụ ruwhnu ngadna eze nụ
nụ ruwhnu Nnwọ Atnurnu wam, be wo awura
abochna, be ji masị igwugwu bukwa n'aka be.

¹⁰ Be ji okne nkọli naakaa,
“Ọznohia aị hi n'aka Chiokike,
nye dazị nụ ngadna eze,
ya nụ Nnwọ Atnurnu.”

¹¹ Kpakara ele enine izi gwuzo gba ngadna eze
wam gburugburu nụ ele okno badnụ wam nụ
nhne ẹno wam zị budnu, dna kpute ruwhnu n'ẹli
nụ ruwhnu ngadna eze wam, kpọnu Chiokike risi
ẹli.

¹² Be kaa,
“Amim! Ngozi nụ igwugwu
nụ akoniche, nụ ọtu mmamma nụ ọson'anya
nụ rikne nụ iknernema
zịnu Chiokike dụ ọkwukokwnu.
Amim.”

¹³ Otu nye okno badnụ sịkwa m, “Ele ka wogwu
iwo awura abochna be bụ ele ke ele? Ndaa hne be
hi va?”

¹⁴ M sa a, “Nda-aị-kwu, m máam, jị magwu.”
Ọ kanụ m, “Ele ka bụ ele hiri n'okne mmekpẹhni
wam whuya, be snurnu iwo be, mee be ziri richna
nụ rime ọvnarna Nnwọ Atnurnu wam.

¹⁵ Kam kpararụ,
be jiri gwuzoru nụ ruwhnu ngadna eze Chiokike,
be jeekpenu a iwhnehnue nụ abalị nụ rime Oro Nso
a.
Nye wam dazị nụ ngadna eze jaagbasa ọro-ẹka a,
be wuru nụ rime a.

¹⁶ Wiri jóogwnu be berere,
akpịri jóokpo be bẹkwnu berere,

ẹhnam jọomu kwno be berere,
 whụruwhuru ẹhni jéeme kwno be berere.
 17 Kwnornu nụ Nnwọ Atnụrnu nye ke zị
 n'esilawuru ngadna eze wam jọobu nye
 nọoznu be lele atnụrnu.
 O joodu be zne nụ risi mini ke bụdnu,
 Chiokike jookwnosnama anya-mini ẹkwna
 n'anya be.”

8

Akara ke ẹsau

¹ Nga Nnwọ Atnụrnu wam kpumernu akara ke
 ẹsau, oligwe dnarnụ bii dụ ichichi awa.

² M whnụrnu m enine izi ẹsau ele gwuzo nụ
 ruwhnu Chiokike, be nyernu be ọkwodu ẹsau.

³ Enine izi berere ke jigwu nhne isensi golu
 varụ gwuzoru nụ ruwhnu ojo ariọhna, be nyernu
 a agida isensi, o gweru a yikọta nụ okpukpe ele nsọ
 Chiokike, gweru a kwa ariọhna n'olu ojo ariọhna
 golu ke zị nụ ruwhnu ngadna eze wam.

⁴ Rụnwurnu isensi wam nụ okpukpe ele nsọ
 Chiokike lizọ nụ ruwhnu Chiokike hite n'aka
 enine izi wam.

⁵ Enine izi wam gweru nhne isensi wam gharụ
 bẹkwnu n'ọjo ariọhna, ghasa a nụ rime ọwa. Agida
 egbe oligwe nụ ọdidna nụ amụma nụ ẹli otne enye
 dnarnụ.

Ọkwodu ẹsau wam

⁶ Enine izi ẹsau wam ji ọkwodu ẹsau jiknernu ọ
 gbụ be.

⁷ Enine izi ke mbọm gbụ ọkwodu a, mkpuru mini
 nụ bẹkwnu gwarụ ọvnarna wusa n'ọwa, otu-ibewa

nụ nga ẹto ke ọwa rne bẹkwnu, otu-ibewa nụ nga ẹto ke isisi nụ kpakara achara bụdnu rnernu bẹkwnu.

⁸ Enine izi ke ẹbo gbụ ọkwodu a, be túbna nhne nụ lele rugwu okpotokpo neerne bẹkwnu nụ rime osimini, otu-ibewa nụ nga ẹto ke osimini ghọ ọvna.

⁹ Otu-ibewa nụ nga ẹto ke nhne zị bụdnu nụ rime osimini nwuma, otu-ibewa nụ nga ẹto ke ọgbo mini kpu.

¹⁰ Enine izi ke ẹto gbụ ọkwodu a. Otu okne mbo hi n'oligwe dna, noonwu lele tọnji dnakwasị otu-ibewa nụ nga ẹto mini, ma nụ risi mini.

¹¹ Rẹwhna mbo wam bụ Nlulu. Otu-ibewa nụ nga ẹto mini noolu nlulu, agida ele badnụ nwurnu kwnornu nụ be nwornu mini wam.

¹² Enine izi ke ẹno gbụ ọkwodu a. Be lulu otu-ibewa nụ nga ẹto ẹhnam, nụ otu-ibewa nụ nga ẹto ẹnwa, nụ otu-ibewa nụ nga ẹto mbo, ke kpayaru otu-ibewa nụ nga ẹto iwhne be zima noonwu, otu-ibewa nụ nga ẹto ke ọbochi nwée iwhne ya nụ otu-ibewa nụ nga ẹto ke abali.

¹³ M leri m anya, m nurnu m otu igno neewhe n'esilawuru oligwe, gweru okne nkoli neesi okokoba, "Awhnụwhnu! Awhnụwhnu! Awhnụwhnu zinu kpakara ele wu n'owa nga be jonu odidna ọkwodu ke ele enine izi ẹto ke gwnarnu jọogbu."

9

¹ Enine izi ke isne gbụ ọkwodu a. M whnurnu m otu mbo hiri n'oligwe dna n'owa, be nyee a snambi ọnuhna olulu awhnụwhnu.

² Mbo wam tuma ọnuhna olulu awhnụwhnu, runwurnu hi nụ rime a whuya nụ lele runwurnu

hi n'okne ite bẹkwonu, iwhne ẹnam nụ ruwhere gbarụ ọchichiri kwnonu rụnwurnu hi n'olulu awnụwhnu wam whụya.

³ Igwurube hi nụ rụnwurnu wam whụya n'olu ọwa, be nyernu be rikne lele akpị ke ọwa.

⁴ Be kanụ be, be lulu achara mọbu isisi, mọbu achara bụdnu berere, kọvu be gba nye ọbula ke nwée akara Chiokike n'egedege ruwhnu a.

⁵ Igwurube wam nwée rikne o gbu be, kọvu be ta be awnụwhnu ẹnwa isne. Nhne igbugbu be nụ lele nye akpị gbarụ.

⁶ N'ẹnwa isne ka, ele badnụ ka jooپیo ẹnwu joogbu be, kọvu be jọowhnu ẹnwu, ẹnwu jọogwnu be, kọvu ẹnwu jaagba ẹso.

⁷ Igwurube wam nụ lele iyinya jiknenu o zne ọgwnu, be kpu nhne nụ lele okpu-eze golu nụ risi be, ruwhnu be nụ lele ruwhnu badnụ.

⁸ Rukeru-ize risi be nụ lele rukeri-ize nyerinya, ize be nụ lele ize odum.

⁹ Mbno mkpoma be nụ lele mbno rugwe, ọdidna aka-nkwu be naadna lele ọgbo-ẹli agida iyinya nọodopnu neezne ọgwnu.

¹⁰ Ọdnu be nụ lele akpị, be nwernu nhne ọgbugba n'ọdnu be, nwe masiri rikne n'ọdnu ọ kpakna ele badnụ ẹhni ẹnwa isne.

¹¹ Be nwernu eze nẹchi be, nye bụ enine izi olulu awnụwhnu. Nye rẹwhna a n'ọnu Hiburu bụ Abadoni, n'ọnu Giriki, Apoloni, ke bụ nye noolulu nhne.

¹² Nhne awnụwhnu ke mbom kwolem, nhne awnụwhnu lawuru berere vawa.

¹³ Enine izi ke isunu gbụ ọkwodu a, m nurnu m otu nkọli hi n'ahnio nụ ngeri ẹno ke ojo arịohna golu

wam bụ ke gwuzo nụ ruwhnu Chiokike whụya.

¹⁴ Nkọli wam kanụ enine izi ke isunu wam ke gburu okwodu, “Sìgbasi enine izi ẹno wam ke be knernụ eriri n'okne Osimini Uferetisi.”

¹⁵ Bè sịgbasi enine izi ẹno wam, ke be jiknern-ernu n'otnu-ige ka n'ọbochi ka, nụ ẹnwa ka, n'awha ka o gbu otu-ibewa nụ nga ẹto ke kpakara ele badnụ.

¹⁶ M nurnu m ọnu ọgwunugwnu ele ọgwun gba iyinya bụ riwhu pokwu ndasị lawuru.

¹⁷ Nụ rime ọwhnurninya wam, m whnurnu m iyinya nụ ele naagba be, be nwernu mbno mkpoma naachna ihie ihie lele bẹkwnu, lele jasinti, nụ rugwu bẹkwnu, risi iyinya wam nụ lele risi odum, bẹkwnu nụ runwurnu nụ rugwu bẹkwnu neehi n'ọnu be ọowhuya.

¹⁸ Bẹkwnu nụ runwurnu nụ rugwu bẹkwnu ke hi n'ọnu iyinya wam ọowhuya gburu otu-ibewa nụ nga ẹto ke ele badnụ.

¹⁹ Kwnornu nụ iknernema be hi n'ọnu be ya nụ ọdnu be. Ọdnu be nụ lele agwọ, ke be ji risi be neemeru ele badnụ ẹhni.

²⁰ Ele badnụ gwnarnụ ke nhne igbugbu ka gbúle, kwéle ọ sịgbasi nhne aka be turu, be kwéle ọ sịgbasi o kpenu rumu renwu ojo, nụ renwu golu nụ ke siliva, nụ ọla nụ akaworugwu nụ ke isisi, ke zá ọowhnu ọsno, zá ọonu nhne, zá neezne izne.

²¹ Ele badnụ wam túhnasnana hite nụ ogbu badnụ be, nụ amusu be neeri, nụ ome ọyi be, mọbu nụ buznu be nooznu.

10

Enine izi nụ

okwukwo matị

¹ Omekwo, m whnurnu m enine izi berere ke nwernu rikne hi n'oligwe hiedna. O wogwu erumeru oligwe, eke nū egwurugwu zị n'olu risi a, ruwhnu a noonwu lele ẹhnam, ọchi a lawuru nū lele nsnusnu ọro bẹkwnu.

² O ji otu okwukwo matị be kpumernu okpume n'aka a. Ọ bīta ọchikwunga a n'osimini, ọchirita a n'olu ẹli.

³ O ji okne nkọli si lulo lele hne odum neebigbo, nga o sikworu okokoba, egbe oligwe ẹsau wam gba n'osisa.

⁴ Nga egbe oligwe ẹsau wam gbakworu, m pi-oru m ọ gba n'okwukwo, m nurnu m otu nkọli hiri n'oligwe naakanu m, “Kpusnime nhne egbe oligwe ẹsau wam kwuru, i gbá be n'okwukwo.”

⁵ Enine izi wam me whnurnu gwuzo n'osimini nū n'olu ẹli, gwelizo akarikwnunga a olu.

⁶ O gweru nye wam zị ọkwukwunu dū risi, bụ nye keru oligwe nū kpakara nhne zị nū rime a, nū ọwa nū kpakara nhne zị nū rime a, nū osimini nū kpakara nhne zị nū rime a. Enine izi wam karu, “Ige kwolem.

⁷ Kọvu nga enine izi ke ẹsau jọogbu ọkwodu a, nhne tugwaru otugwa ke Chiokike jeemezu, lele kpa o kwuru hite n'ọnu ele izi a, bụ ele ọwhnurninya.”

⁸ Nkọli wam me nurnu hi n'oligwe nookwunu m ọka, kwukwnonu m ọka berere, ọ kaa, “Zne, gweru okwukwo matị wam be kpumernu okpume ke zị n'aka enine izi wam gwuzo n'osimini n'olu ẹli.”

⁹ M znekwnusi enine izi wam, kanu a o nyee m okwukwo matị wam. Ọ kaa, “Gweru a, ri a, o joolu

nlulu nụ ruwho ị, kọvu ọ jọoso n'ọnu ị lele mọno ebeka.”

¹⁰ M gweru okwukwo wam n'aka a, ri a, ọ nụ lele mọno ebeka n'ọnu m, kọvu kpa me rikworu a, o mernu ruwho m lu nlulu.

¹¹ Ọ kanụ m, “I jọokpo okwo ikwu-ọnu Chiokike ka berere nụ ruwhnu agịda ele badnụ, nụ mba zị ọdo n'ọdo, n'ikwu-ọnu zị ọdo n'ọdo, ma nụ ruwhnu ele eze.”

11

Ele akebne lawuru

¹ Be nyernu m otu isisi lele nhne be ji nọtụ nhne, be kanụ m, “Lizọ, tų Ọro Nsọ Chiokike, nụ ojo ariohna, gwnụ ele nọokpo risi ẹli nụ rime a.

² Kọvu ị tų n'ederezi, kwnornu nụ be nyernu a ele bụo ele Ju, ele jọozodna ẹli-ọhna nsọ wam nri ẹnwa ẹno nụ ẹnwa lawuru.

³ M jeezizne ele akebne m lawuru, be joowo iwo mkpe zni izi ọma otu pokwu ọbochi nụ riwhu ọbochi lawuru nụ nri isunu.”

⁴ Ka bụ isisi olivu lawuru wam nụ nhne be bita tọnji lawuru wam gwuzo nụ ruwhnu Nyenwe ọwa.

⁵ Nye irno ọbula ke pioru ọ kpakna be ẹhni, bẹkwnu hi n'ọnu be jeernegbu be. Nye ọbula ke kpaknarnụ be ẹhni jọonwuriri kpa.

⁶ Ele ka nwernu rikne o knesni oligwe, ke mernu mini ozuzo zóle kpakara ige be nọokpo okwo ikwu-ọnu Chiokike, be nwernu rikne o mee kpakara mini ghọ ọvnarna, nụ rikne o mee ele zị n'ọwa ria ẹhni igbugbu ọbula lele kpa be pioru.

⁷ Nga be gbasakworu ikwu-ọnu Chiokike, anọhia wam hi nụ olulu awhnụwhnu, lusi be ọgwnu, megbu be, gbu be.

⁸ Iznu be joovubi n'esilawuru apna okne ẹli-ọhna wam be nookwu n'elulu Sodom nụ Ijipiti, hne be kpogburu Nyenwe be n'olu ọgba.

⁹ Kpakara ele badnụ, nụ ẹbnurnu, nụ ikwu-ọnu, nụ mba zị ọdo n'ọdo, jeelekiri iznu be ọbochi ẹto n'ichichi, be jéekwe be li be.

¹⁰ Kpakara ele zị n'ọwa joonwudna, mkpoma sọ be n'ọnu kwnornu nụ be nwurnu, be neeziznenu ibne be nkesi kwnornu ele ọwhnurninya lawuru ka nwurnu ọnwu bụ ele mernu ele zị n'ọwa ta awhnụwhnu k'agida.

¹¹ Nga ọbochi ẹto n'ichichi whemernu, enine budnu hiri nụ Chiokike bnazne nụ rime be, be gwuzoru, okne ogwnu turu kpakara ele whnurnu be.

¹² Ele ọwhnurninya lawuru wam nurnu otu nkoli hiri n'oligwe noosukwu be, “Anụ va n'olu hna.” Be lizo, la n'olu n'erumeru oligwe, kpa ele irno be neelekiri be.

¹³ N'ige wam, okne ẹli otne enye dnarnụ n'ọwa, ke mernu otu nga nụ nri nga ẹli-ọhna wam lulu, ẹli otne enye wam gburu pokwu badnụ ẹsau, ogwnu turu ele ke gwnarnụ, be znarni Chiokike ke oligwe.

¹⁴ Nhne awhnụwhnu ke ẹbo whemernu, kovu le, nhne awhnụwhnu ke ẹto wawa wara wara.

Okwodu ke ẹsau

¹⁵ Enine izi ke ẹsau gbụ okwodu a, agida nkoli dnarnụ n'oligwe, naakaa,
“Eli-eze k'ọwa ka ghọlam ẹli-eze ke Nyenwe aị nụ ke
Karaịsi,

ọ jaachị hite n'ige kwó okwo dụ n'ige kwó okwo.”

16 Nri ele okno badnụ lawụru wam nụ ẹno ele dazị nụ ngadna eze be nụ ruwhnu Chiokike, dna kpu ruwhnu n'ẹli, kpọnu Chiokike risi ẹli.

17 Be kaa,

“A nọotunu ị mmamma, Nyenwe aị Chiokike ke
Meli Nhne Dum,
nye zị, nye zị nụ mbọm,
kwnornu nụ i jì okne iknernema ị nẹchi.

18 Ovu neewe ele zị n'ọwa ẹhni, kwnornu nụ ọnuma ị valẹm,
ige i jeekpe ele nwurnu ọnwu ikpe valẹm,
nụ ige ị jọkwu ele izi i, ele ọwhnurninya ị ọgwo ẹrnu
nụ kpakara ele ke i, nụ ele nọotu ogwnu i
ma nye kwu nụ nye matị,
nụ ige o lulu ele luluru ọwa.”

19 Be gbamarnụ Ọro Nsọ Chiokike n'oligwe, be whnurnu Igbe Ọgba-Njọ-Ẹhni Chiokike nụ rime a, agịda amụma, nụ ọdidna, nụ egbe oligwe, nụ ẹli otne enye, nụ okne mkpuru mini dnarnụ.

12

Nwerinya wam nụ okne agwọ wam

1 Otu okne nhne ndu-ẹhni mernu n'oligwe. Otu nwerinya wogwu iwo ẹhnam, nye ẹnwa zị nụ mkpururu ọchi a, o kpu okpu-eze nwernu nri nụ mbọ lawụru nụ risi.

2 Nwerinya wam zị rime, rime ọmumu nnwọ neeme a, ọ kwna ẹkwna kpa ọ nọomu nnwọ.

³ Nhne ndu-ehni berere whuya kwno n'oligwe, otu agwo okpotokpo ihie ke nwernu risi esau nu nri mfu, kpu okpu-eze esau nu risi esau a.

⁴ O ji odnu a doru otu-ibewa nga eto mbo ke oligwe dodna be n'owa, o zne gwuzoru nu ruwhnu nwerinya wam nomu nnwo ma o ri nnwo wam wara wara o muiaru a.

⁵ Nwerinya wam muhia nnwo rukna, nye jeeji mkpara rugwe neechi kpakara mba, kovu be kwumernu nnwo wam, kwuznenu a Chiokike nu ngadna eze a.

⁶ Nwerinya wam gbawhu, gbabna nu rime eli-ikpa, hne Chiokike bitannu a, ma be lekasi a anya pokwu obochi nu riwhu obochi lawuru nu nri isunu.

⁷ Ogwnu dna n'oligwe, Maikeli nu ele enine izi a lu ogwnu megidne agwo wam, agwo wam nu ele enine izi a lu ogwnu megidne be.

⁸ Kovu Maikeli nu ele enine izi a megburu agwo wam, oghere zimana agwo wam nu ele enine izi a n'oligwe berere.

⁹ Be chidna agwo okpotokpo wam, ke bu agwo oknani wam bu Ekwensu mibu Setani n'owa, nye nooduwhu kpakara ele zi n'owa. Be chidnarnu ya nu kpakara ele izi a.

¹⁰ Ige wam, m nuru m otu okne nkoli n'oligwe, kaa,

“Oznohia valem, nu rikne nu eli-eze Chiokike ai,
 nu iknernema Karaisi a,
 kwnornu nu be chidnarnu nye noobno rumu nda ai
 nhne,
 bu nye noobno be nhne nu ruwhnu Chiokike
 iwhnehnue nu abali.

11 Be jiri ọvna nna Nnwọ Atụrnu wam
 nụ akebe be gbarụ
 megbu a,
 be whnuna bụdnu be n'anya
 du n'enu.

12 Kam kpaya, oligwe nwudnahoru,
 ovu oso anu n'onu ele wu nu rime a.
 Kọvu awnwhnu zinu ọwa nu osimini,
 kwnornu nu Ekwensu vakwnusilem anu,
 onuma jiri a mkpoma,
 kwnornu nu o magwu nu ige a zi ichichi.”

13 Nga agwo wam whuru nu be chidnaru a
 n'owa, o bete o chi nwerinya wam eso bu nye
 muru nnwo rukna wam.

14 Be nye nwerinya wam aka-nkwu lawuru ke
 okne igno ma o wheru iwhe zne hne o wu n'eli-
 ikpa, hne be jeeleka a anya awha eto nu enwa
 isunu hne agwo wam bo o whuna a.

15 Agwo wam gbuhia agida onu-mini a gbasno
 nwerinya wam, ma o vuru nwerinya wam.

16 Kọvu eli yinnu nwerinya wam aka, kpumernu
 onu a, nwokwo mini agwo wam gbuhiaru n'onu a.

17 Agwo wam we ovu ehni k'agida megidne
 nwerinya wam, o zne nopolusi agwna rumu
 nwerinya wam ke gwnaru ogwu, bu ele bitaru
 nhne Chiokike nyernu n'iwu, nu ele kwesiri
 okwnata ovu n'eziri aka Jizosi gesiri.

18 Agwo wam gwuzoru n'olu riza ke osimini.

13

Anohia lawuru

1 M whuru m otu anohia hi nu rime osimini
 n'owhuya, o nwernu nri mfu nu risi esau, o kpu

okpu-eze n'olu mfu a, be gbakwasiri n'olu kpakara risi a rewhna ojo nookwulu Chiokike.

² Anohia me whnurnu nu lele agwnu, ochi a lawuru nu lele anohia bea, onu a nu lele onu odum. Agwo wam nyee anohia wam rikne a, ngadna eze a nu okne iknernema.

³ O nu lele nu be gburu otu risi anohia wam, kovu nhne omernu ehni wam ke nwernu rikne o vuya enwu gworu, o tu kpakara owa n'anya, be gasnornu anohia wam.

⁴ Be kpou agwo wam risi eli ke nyernu anohia wam iknernema a, be kpou masinu anohia wam risi eli, naakaa, "Nyele nu lele anohia ka? Nyele nwernu rikne o lusi a ogwnu?"

⁵ Be nyernu anohia wam rikne o ji nookwu agida nhne zi ogwnu nu oka ojo nookwulu Chiokike, o nwernu rikne nri enwa eno nu enwa lawuru.

⁶ Anohia wam kpume onu a nookwulu Chiokike, nu rewhna a, nu Oro Nso a, nu kpakara ele wu n'oligwe.

⁷ Be nyernu a rikne o lusi ele nso ogwnu nu o megbu be, be nyee kwno a rikne megidne kpakara avnurnu nu ele badnu nu ikwu-onu nu mba.

⁸ Kpakara ele wu n'owa jokponu a risi eli, ele be gbala rewhna be nu rime okwukwo budnu ke Nnwọ Aturnu nye be gburu hite n'okike owa.

⁹ Nye nwernu nsni, o nurnu.

¹⁰ Nye obula be jodoru n'ogwnu
be jodoru a n'ogwnu.

Nye obula be jeeji ama-ogwnu gbu,
be jeeji ama-ogwnu gbu a.

Ele nso jeenwe okwnata ovu nu ndidi.

11 M whnu anohia berere hi n'eli n'owhuya. O nwernu mfu lawuru lele mfu nnwo aturu, o nookwu oka lele agwo.

12 O ji rikne anohia mbom wam nu ruwhnu a. O mernu kpakara owa nu ele zi nu rime a kponu anohia mbom wam risi eli, nye be gworu nhne omernu ehni wam ke noovuya enwu.

13 Anohia ke ebo ka rnu enu rikne, o mernu bekwu hi n'oligwe dna n'owa n'anya ele badnu.

14 O duhie kpakara ele wu n'owa kwnornu enu ndu-ehni ka ke be nyernu a rikne o rnu nu ruwhnu anohia ke mbom. O kanu ele zi n'owa be kpu igbudu anohia wam ke be jiri ama-ogwnu mernu ehni, kovu o zi budnu.

15 Be nyernu anohia ke ebo wam rikne o nwesi inwe budnu nu rime igbudu anohia mbom wam, ke kpararu igbudu wam nookwu oka, kaa be noogbu kpakara ele kwéle o kponu igbudu wam risi eli.

16 O mee kpakara ele badnu ma nye mati ma nye kwu, nye baru eze nu nye mboni, ohi nu nye buo ohi, be narnu akara nu akarikwnunga be mōbu n'egedege ruwhnu be.

17 O za nye nwernu rikne zu nhne mōbu re nhne, okwolem nye nwernu akara anohia wam ke bu rewhna anohia wam, mōbu ogwnugwnu rewhna a.

18 Nye obula nwehia akoniche, nye obula ke nwernu ogwnugwnu risi, o mahia ogwnugwnu anohia wam, kwnornu nu o bu ogwnugwnu badnu, ogwnugwnu a bu riwhu isunu nu nri isunu nu isunu [666].

14

Nnwọ Aturu nu ele ke a

¹ M leru m anya, whnụ Nnwọ Atnụrnu gwuzo n'olu rugwu Zayoni, ya nụ otu riwhu nụ nri ẹno nụ pokwu ẹno ele badnụ, be vu ẹwhna a nụ ẹwhna Nda a n'egedege ruwhnu be.

² M nurnu m otu nkọli hi n'oligwe dna lele agida mini, nụ okne nkọli egbe oligwe, m nurnu m ele naagba ọbo ji ọbo be naagba.

³ Be gwnụ eri ikne nụ ruwhnu ngadna eze wam, ma nụ ruwhnu nhne ẹno wam zị bụdnu, nụ ele okno badnụ wam. Ọ zá nye nwernu rikne sno be gwnụ eri wam, okwolem otu riwhu nụ nri ẹno nụ pokwu ẹno wam ele be gbaharu n'owa.

⁴ Ka bụ ele mέρula ẹhni be n'ẹhni nyerinya kwnornu nụ be bítaru ẹhni be snam. Be joosno Nnwọ Atnụrnu wam penupe ọbula o neezne, be gbaharu be n'esilawuru ele badnụ lele mkpuru mbom be kesiri Chiokike nụ Nnwọ Atnụrnu a.

⁵ Ọ zá aghalaghala be whnurnu n'onu be, be zị snam.

Ele enine izi ẹto

⁶ M whnurnu m enine izi berere neewhe n'oligwe, nọokpo okwo izi ọma ke zị ọkwukokwnu n'owa, ma kpakara ele mba, nụ avnurnu nụ ikwu-onu nụ ele badnụ nurnu a.

⁷ O ji okne nkọli naakaa, “Anụ tų ogwnu Chiokike, anụ znarni ebube a, kwnornu nụ ige valẹm o jeekpe kpakara badnụ ikpe, anụ kponu nye keru oligwe, nụ owa, nụ osimini, nụ kpakara risi mini risi ẹli.”

⁸ Enine izi ke ẹbo snornu ke mbom kaa, “Ọ dnanam, Babiloni dnanam, okne mba ke mernu kpakara ẹli nwọ manya okne ome ọyi a.”

⁹ Enine izi ke ẹto snornu be gweru okne nkọli kaa, “Nye ọbula ke kpọnnu anọhia wam nọ igbudu a risi ẹli, nahọru masi akara a n'egedege ruwhnu a, mọbu n'aka a,

¹⁰ ọ jọonwo manya okne ovu owe ẹhni Chiokike, ke ọ wusaru nọ rikne, ke be gwála agwa nọ rime okiko ọnuma a, be jeeji bẹkwnu nọ rugwu bẹkwnu ta a awhnụwhnu nọ ruwhnu ele enine izi nsọ nọ ruwhnu Nnwọ Atnurnu wam.

¹¹ Rụnwurnu awhnụwhnu be zị naala olu ọkwnukokwnu, be zá noozukwa inwe iwhnehnie nọ abali, bu ele wam kpọnnu anọhia wam nọ igbudu a risi ẹli, nọ nye ọbula ke nahiaru akara rẹwhna a.”

¹² Ele nsọ jeenwe ndidi, ele naabita nhne Chiokike nyernu n'iwu nọ ele kwnataru Jizosi mkpoma.

¹³ Nga wam m nurnu m nkọli hiri n'oligwe kaa, “Gba n'okwukwo, ọwa ọma zinu ele nwurnu nọ rime Chiokike hite nọ kịtna.”

Enine Nsọ kaa, “Owe, be joozukwa inwe n'ernu be, kwnornu nọ ernu be joosno be n'aznu.”

Ogwe nhne n'ekwu ke ọwa

¹⁴ M le anya, whnu, otu erumeru abochna, otu nye nọ lele Nnwọ ke Badnu dazi n'olu erumeru wam, o kpu okpu-eze golu nọ risi a, o ji ama ẹkwu zị buko n'aka a.

¹⁵ Enine izi berere hi nọ rime Oro Nsọ whuya, gweru okne nkọli kanu nye wam dazi n'erumeru, “Gweru ama i, gweru nhne n'ekwu, kwnornu nọ ige o gwe nhne n'ekwu k'owa valem, mkpuru k'owa chnanam.”

16 Nye wam dazị n'erumeru gweru ama a yisi nụ rime ọwa, gweru nhne ẹkwu k'ọwa.

17 M whnuru m enine izi berere hi n'Oro Nso n'oligwe, o ji masị ama zị buko.

18 Enine izi berere ke nwernu rikne megidne bekwu, hi n'oyo arịohna whuya. O gweru okne nkoli kanu enine izi wam ji ama zị buko, "Gweru ama i ghohia mkpuru vaini ke ẹkwu, kwnornu nụ vaini ke ọwa chnanam."

19 Enine izi wam yisi ama a, ghohia mkpuru vaini, tubna be nụ rime hne be jozosna manya okne ovu owe ẹhni Chiokike.

20 Be zosna manya vaini wam n'aznụ ẹli-ohna, ọvnarna a gbahia nụ hne be nozosna manya wam du nhne nụ lele riwhu maịli lawuru, du oknesni onu iyinya n'olu.

15

Nhne awhnurwhnu ẹsau

1 M whnụ nhne berere n'oligwe, okne nhne ndu-ẹhni. Enine izi ẹsau vu nhne awhnurwhnu ẹsau ke ipne-aznụ, okne ovu owe ẹhni Chiokike ke ipne-aznụ zị nụ rime be.

2 M whnụ kwno nhne nụ lele osimini nyno be gwaru bekwu, nụ ele wam megburu anohia wam nụ igbudu a nụ onu ogwnugwnu rewhna a, hne be gwuzo nụ ngeri osimini nyno wam, be ji obo Chiokike nyernu be.

3 Be noogwnu eri Mozizi nye izi Chiokike nụ eri Nnwọ Atnuru wam,

“Eru i tu n'anya, zị masị rikne!

Nyenwe aị Chiokike ke Meli Nhne Dum,
Kpakara apna i sniri asni buru ezi oka,

Eze zị ọkwnukokwnu.

⁴ Nyele jọotu ogwnu i, Nyenwe aị?

Nyele jóokwuhia igwugwu ke ọwhna i?

Kwnornu nụ jị nụ nsununu i zị nsọ,

kpakara mba jaava kpọ risi ẹli nụ ruwhnu i,

kwnornu nụ ikpe buru oma i zuru kpakara
ọwa.”

⁵ Nga ka mekworu, m whnụ Ọro Nsọ Chiokike n'oligwe gbamarnụ bụ Ọro-Ẹka ruwhnu Chiokike.

⁶ Enine izi ẹsau wam vu nhne awhnụwhnu ẹsau hi nụ rime Ọro Nsọ wam whụya, be wogwu iwo noonwu onwu, be ji ajnị mkpọma golu kne nụ mkpọma be.

⁷ Otu nhne zị bụdnu wam nyega enine izi ẹsau wam obele ẹsau okne ovu owe ẹhni Chiokike jihia ru nụ rime be, bụ nye zị bụdnu ọkwnukokwnu.

⁸ Runwurnu jihia Ọro Nsọ wam hite n'igwugwu nụ iknernema Chiokike, ọ zá nye nwernu rikne ọ bna Ọro Nsọ wam tem awhnụwhnu ẹsau wam enine izi ẹsau wam vuyarụ kwome.

16

Obele ẹsau ovu owe ẹhni Chiokike

¹ Ige wam, m nurnu m otu okne nkọli hi n'Ọro Nsọ wam naakanụ enine izi ẹsau wam, “Anụ zne wusa obele ẹsau ovu owe ẹhni Chiokike n'ọwa.”

² Enine izi ke mbom zne wusa obele a n'ọwa, esuso ẹhni tū ogwnu noogbu igbugbu se kpakara ele vu akara anohia wam n'ẹhni, nụ kpakara ele kponnu igbudu wam risi n'ẹli.

³ Enine izi ke ẹbo zne wusa obele a n'osimini, o gho ọvna nū lele ọvna nye nwurū ọnwu, kpakara nhne zi buda nū rime osimini nwukwo.

⁴ Enine izi ke ẹto zne wusa obele a nū mini nū kpakara risi mini, be gho ọvna.

⁵ M nūnu m nga enine izi ke neelegidne mini karu,

“Ji bu nye mee mma n'ikpe
ji bu nye zi, nye zi nū mbom, Nye zi Nso,
kwnornu nū i kperu ikpe nū kpa.

⁶ Be wusaru ọvna ele nso i nū ele ọwhnurninya i,
i nyee be ọvna be nwọ lele mini,
kwnornu nū be kwesiri a.”

⁷ M nūnu m otu nkoli hi n'ọjo ariohna naakaa,
“Owe! Nyenwe a Chiokike ke Meli Nhne Dum,
ikpe i buru oma, bu masi ezi oka.”

⁸ Enine izi ke ẹno zne wusa obele a n'ehnam, o neerne ele badu lele bekwnu.

⁹ Okne okpe bekwnu rne ele badu, be kosna rewhna Chiokike nye nwernu rikne nū hne awnwhnu ka zi. Kovu be kwéle o tuhna nū mmehie be znari Chiokike.

¹⁰ Enine izi ke isne zne wusa obele a n'olu ngadna eze anohia wam. Okne ochichiri gbasni eli-eze anohia wam, ele badu naatabi riro be kwnornu nhne igbugbu.

¹¹ Be kosna Chiokike ke oligwe kwnornu nhne igbugbu be nū nhne mernu ehni be. Kovu be kwéle o tuhna nū apna ojo be.

12 Enine izi ke isunu zne wusa obele a n'okne Osimini Uferetisi, mini a takwo, kpa mini a takworu, apna ele eze hi n'obosi ehnam whuya. *

13 M whnu renwu eto zila richna lele redokpo, hi n'onu agwo wam, nu onu anohia wam, nu onu nye owhnurninya aghalaghala wam n'owhuya.

14 Be bu renwu ojo n'ornu ernu ndu-ehni. Renwu eto ka znekwunusi ele eze owa, chikota be n'otu kwnornu ogwnu okne obochi Chiokike ke Meli Nhne Dum.

15 Le, m jaava lele nye buznu, ngozi zinu nye obula neese nse, bikwata iwo a, o zi kpa o gbaru eto zneghari, iwhnerne tu a n'ohna.

16 Renwu ojo wam chikota kpakara eze nu hne ele Hiburu nookwu Amagidoni.

17 Enine izi ke esau zne wusa obele a nu ruwhere. Otu okne nkoli hi nu ngadna eze zi n'Oro Nso wam, kaa, "Be menem a."

18 Agida amuma oligwe, nu odidna, nu egbe oligwe nu okne eli otne enye dnarnu, eli otne enye nu kpm zigelele hite nga Chiokike kpuru badnu. Eli otne enye ka kakwo ibne a.

19 Eli-ohna kwu wam kewamarnu nga eto, eli-ohna kpakara mba luluru. Chiokike chenwanya Babiloni, mee a o nwọ manya hi n'ikiko okne ovu owe ehni a.

20 Kpakara eli ohia esilawuru nu rugwu gbawhu, whume.

21 Okne mkpuru mini neenyi rinya † naadnakwasị ele badnu hite n'oligwe. Ele badnu n'ovu

* **16:12** Nga apna wam whuyaru, ele irno be whnurnu oghere bnanya lusi be ogwnu. † **16:21** Mkpuru mini wam neenyi nu nhne otutu 50 kg.

Chiokike ọnu kwnornu mkpuru mini wam, nụ
kwnornu awhnụwhnu wam zị ogwnu ke agịda.

17

Nwerinya nụ anọhia

¹ Otu nụ rime ele enine izi ọsau wam vu obele
ọsau vakwnusi m kaa, “Vaa, me gesi i awhnụwhnu
okne nye ewhere wam ke dazị n'olu agịda mini,

² nye ele eze ke ọwa snornu mee ọyi, ele zị n'ọwa
nwọrnu manya ewhere a.”

³ Enine izi wam vuru m n'Enine zne nụ rime
ẹli-ikpa, hne me whnụrnu otu nwerinya dazị n'olu
anọhia naachna ihie ihie. Anọhia wam nwernu
agịda rẹwhna ọjọ nookwulu Chiokike be gbakwasịri
a, o nwernu risi ọsau, nụ nri mfu.

⁴ Nwerinya wam wogwu iwo odno odno nụ ihie
ihie, o jiri nhne ẹyi golu nụ rugwu okne ọnu ahia nụ
palị mee ẹhni a mma, o ji ikiko golu n'aka a, nhne
ruru ọru nụ nhne zila richna ke ome ọyi a jiharuru nụ
rime a.

⁵ Be gbakwasịri a otu rẹwhna n'egedege ruwhnu,
Nhne miri emi,
okne Babiloni,
nne kpakara ele ewhere
nụ nhne ruru ọru ke ọwa.

⁶ Ọvnarna ele nsọ nụ ele be gburu kwnornu Jizọsi
noogbu a lele manya.

Ọ gbarụ m anya agharị nga me whnụrnu a.

⁷ Enine izi wam kanụ m, “Ndaa kpa o jiri naagba
i anya gharị? M jaakanụ i nhne tugwaru otugwa
gbasịri nwerinya ka nụ anọhia ke vu a, bụ anọhia
ke nwernu risi ọsau nụ nri mfu.

⁸ Anọhia ke i whnuru nị bụdnu nụ mbom, kovu o nwuru, o jeehi n'olulu awnuruwhnu whuya zne n'enwu a. Kpakara ele wu n'owa ele be gbala rewhna be n'okwukwo ke bụdnu hite n'okike owa, o jootu be n'anya nga be whnuru anọhia wam zị bụdnu nụ mbom, kovu o nwuru, o jaazi kwno bụdnu.

⁹ “A kwesiri o nwe ovu ke nwernu akoniche, risi esau wam bu rugwu matị esau ke nwerinya wam dazi n'olu a. Be bu masi ele eze esau,

¹⁰ isne dnam, otu nechi koriri, otu ya vage. Nga o varu, o jaadazi ige matị.

¹¹ Anọhia wam zị bụdnu nụ mbom, ke nwuru, bu eze ke esato, nye zị n'esilawuru eze esau wam, jaala n'iyi.

¹² “Nri mfu wam i whnuru bu masi nri eze ele ya vage echi, kovu be jeenye be rikne otu otu-ige lele eze snornu anọhia wam chi.

¹³ Be nwernu otu mkpoma, be jeenye anọhia wam iknernema nụ rikne be.

¹⁴ Ele ka jolusi Nnwọ Aturu wam ogwu, kovu Nnwọ Aturu wam jeemegbu be, kwnornu nụ o bu Nyenwe ke kakwo ele nwe nụ Eze kakwo ele eze. Ele sno a bu ele o sukwuru, ele o hohiaru nụ ele kwesiri okwnata ovu.”

¹⁵ O kanu m, “Mini ke i whnuru hne nwerinya ewhere wam dazi, bu ele badnu, nụ agida ele badnu, nụ mba nụ ikwu-onu zị odo n'odo.

¹⁶ Anọhia wam nụ nri mfu wam i whnuru joosno nwerinya ewhere wam irno, be jaanahoru a kpakara nhne o nwernu, gbata a eto, be jeeri anọ-ehni a, kporne a nụ bekwu.

¹⁷ Kwnornu nụ Chiokike yisiri a nụ mkpoma be, ma be mee echiche a, be jeekwerikota o nyee

anohia wam ẹli-eze be, ọ jaachị be tem Chiokike mezu ikwu-ọnu a.

¹⁸ Nwerinya wam ị whnuru bu okne ẹli-ohna wam ke nechi kpakara ele eze ke ọwa.”

18

Odudna Babiloni

¹ Nga nhne ka mekworu, m whnuru m enine izi berere hi n'oligwe neehidna, o nwernu okne iknernema, ogbu marna marna ruwhnu a neenye iwhne n'owa.

² O gweru okne nkoli siwama, kaa,
 “O dnanam, okne Babiloni dnanam,
 ọ gholam hne rumu renwu ojo wu,
 ọro ikelu kpakara renwu zila richna,
 kpakara onunu ojo ke be ri eri zi nu rime a.

³ Kwnornu nu kpakara mba
 nwornu manya okne ome oyi a,
 ele eze ke ọwa snornu a mee oyi,
 ele nozu ahia ke ọwa baru eze hite nu okne
 ewhere a.”

⁴ M nu kwno okne nkoli hi n'oligwe kaa,
 “Ele ke m, anu hi n'esilawuru a whuya,
 ọ zi anu snornu a kehia igwe nu mmehie a,
 ọ zi anu snornu a ta awhnuwhnu.

⁵ Kwnornu nu mmehie a gwuzo du oligwe,
 Chiokike chenwanyalam kpakara mmehie a.

⁶ Anu mesno a lele kpa o mernu anu,
 anu mesno a mgba lawuru kpa o mernu,
 okiko o gbajiri, anu gbajite a mgba lawuru ma
 o nwornu.

⁷ Anu ta a awhnuwhnu nu anya-mini

lele kpa o nyernu ẹhni a igwugwu nụ ẹgwnurnu ojo
 a,
 kwnornu nụ ọ karu nụ mkpoma a,
 ‘M bu m eze nyerinya, m bula m nnwerne nwée
 nzi,
 m jáagba mkpe.’

⁸ Kam kpayarụ, n'otu ọbochi, ọ jọowhnuji anya,
 ẹnwu, mkpe, nụ ọknunyo,
 bẹkwnu jeernegbu a,
 kwnornu nụ Nyenwe a Chiokike ke neekpe a ikpe
 bu dikne.

⁹ “Nga ele eze ke ọwa ele snornu a mee ọyi,
 n'ẹgwnurnu ojo a, jọowhnu runwurnu bẹkwnu a, be
 jaakwna ẹkwna, gbanu a mkpe.

¹⁰ Be joogwuzo nụ hne zi ikere kwnornu ogwnu
 awnụwhnu a, kaa,
 ‘Chei, chei, okne ẹli-ọhna,
 Babiloni, bu dikne,

Chiokike taru i awnụwhnu n'otu ọtnu-ige.’

¹¹ “Ele nọozu ahia ke ọwa jaakwanu a ẹkwna,
 gbanu a mkpe, kwnornu nụ ọ zá nye nọozu kwno
 mgwna ahia be berere.

¹² Be bu ele nọozu ahia golu, siliva, rugwu okne
 ọnu ahia, pali, iwo marnu mma, iwo naachna odno
 odno, siliki nụ iwo naachna ihie ihie, isisi ọbula,
 nhne ọbula be jiri ize eni kpu, nhne ọbula be jiri isisi
 zi okne ọnu ahia pniọ, ọla, rugwe, rugwu mabulu,

¹³ nụ sinamoni, nụ nhne nwernu ẹknarna, isensi,
 maa, franki-isensi, nụ manya, nụ mọno olivu, nụ
 ikpa nụ wheti, nụ anọhia, nụ atnurnu, nụ iyinya, nụ
 ọgbo-ẹli iyinya nọodopnu, nụ ọhi, ma mkpuru ovu
 badnu masi.

14 “Be kaa, ‘Nhne i pioru whnunahọru i, kpakara ẹkwnu i nọ ebube i whuru etekne, i jéenwe kwno be berere.’

15 Ele nọozu ahia, ele baru eze kwnornu nọ be neere nhne ka, joogwuzo nọ hne zị ikere, ogwnu nọotu be kwnornu awnụwhnu a, be naakwa ẹkwna, gba masị mkpe.

16 Be jeesiwama okokoba, kaa,
 ‘Chei, chei, ẹli-ọhna kwu,
 ke jiri iwo marnu mma odno odno nọ ihie
 ihie,
 nọ golu noogbu marna marna, nọ akaworugwu
 okne ọnu ahia nọ palị mee ẹhni a mma.

17 Agida ẹkwnu hna kpa whuru etekne n'otu ọtnu-ige.’

“Kpakara ele nọokwo ọgbo mini nọ ele ji ọgbo mini neezne, nọ ele ẹrnu mini, nọ kpakara ele nhne be jiri wuru budnu hi nọ mini whuya, joogwuzo nọ hne zị ikere.

18 Nga be jọowhnu runwurnu bẹkwnu a, be jaakaa,
 ‘Ọ zị ẹli ke nọ lele okne ẹli-ọhna ka?’

19 Be jọowukwasi rẹtnu nọ risi be, kwna ẹkwna,
 gba mkpe, kaa,

‘Chei, chei, okne ẹli-ọhna,
 hne kpakara ele nwernu ọgbo mini
 baru eze hite n'ẹkwnu a,
 n'otu ọtnu-ige hne ọ kọ túbiri etekne.

20 Ovu sọ i n'ọnu, sọ oligwe,
 ele nsọ nọ ele izi nọ ele ọwhnurninya snornu anọ
 nwudna,
 Chiokike kperu a ikpe kwnornu nhne o mernu
 anọ.’”

21 Otu enine izi gbasiri rikne gweru otu akaworugwu hna lele okne rugwu ogwe wiri tubna nu rime osimini, kaa,

“O bu kpa be jeeji nhne rikne
kwnadna okne eli-ohna Babiloni,
o za nye jowhnu a berere.

22 Be jonu kwno eri, mabu obo, opi,
mabu okwodu nu rime i berere,
nye obula ke nwernu nka ernu
jazai nu rime i berere,
o za nye jonu odidna ogwe wiri
nu rime i berere.

23 Tonji jonwuma
nu rime i berere,
akpiri nye nolu nnwerne ikne nu nye nogbo nzi
ikne,
jazaima nu rime i berere,
kwnornu nu ele nozu ahia i bu ele dikne ke owa,
i jiri amusu i duwhu kpakara mba.

24 Be pioharu nu rime a onarna ele owhnurninya nu
onarna ele nsu,
nu kpakara ele be gburu ogbu nu rime owa.”

19

1 Nga nhne ele ka whemernu, m nurnu m nhne
nu lele okne nkoli igbudu badnu n'oligwe, naakaa,
“Aleluya,

oznohia, nu igwugwu nu rikne bu ke Chiokike
ai,

2 kwnornu nu ikpe a buru oma nu ezi oka,
o marnu nwerinya okne ewhere wam ikpe
nye jiri ome oyi a meru owa,
o megwnahialam onarna ele nsu a n'aka a.”

³ Berere kwno be siwama, kaa,
 “Aleluya,
 rụnwurnu bẹkwnu a naala olu dụ
 ọkwukokwnu.”

⁴ Ele okno badnụ nri lawuru nụ ẹno nụ nhne ẹno
 wam zị bụdnu wam dna n'ẹli kpọ risi ẹli nụ ruwhnu
 Chiokike nye dazị nụ ngadna eze. Be kaa,
 “Amịm, Aleluya.”

*Ọlulu nnwerne
 ke Nnwọ Atnurnu*

⁵ Otu nkọli hiri nụ ngadna eze wam whụya kaa,
 “Znarnị Chiokike aị,
 anụ ele izi a,
 anụ ele nọotu ogwnu a,
 ma nye matị ma nye kwu.”

⁶ M nurnu m nhne nụ lele nkọli igbudu badnụ
 lele ọdidna agịda mini, lele okne egbe oligwe,
 naakaa,
 “Aleluya,

 Nyenwe aị Chiokike ke Meli Nhne Dum nẹchi.

⁷ Ngwa ma a nwudna, ovu sọ aị n'ọnu,
 a nyee a igwugwu,
 kwnornu nụ ọlulu nnwerne ke Nnwọ Atnurnu
 wam valẹm,
 nnwerne a jiknernunem ẹhni a.

⁸ Be nyernu nnwerne a iwo abọchna, zị rịchna,
 noonwu onwu va-a-a, o woru.”

(Iwo abọchna wam bụ ome mma ke ele nsọ.)

⁹ Enine izi wam kanụ m, “Gba n'ọkwukwo, 'Ngọzi
 zịnu nye ọbula be sukwuru va n'iriri ọlulu nnwerne
 Nnwọ Atnurnu wam.' ” Ọ kaa kwno, “Ikwu-ọnu ka
 bụ ezi ọka Chiokike.”

10 M dna n'eli n'ochi enine izi wam ma m kpõnu m a risi eli, kovu o kanu m, "I mee kpam, m bu m nye izi ibne i nu ke rumu nda i ele berere bu ele ji akebne Jizosi. Kponu Chiokike risi eli. Kwnornu nu akebne Jizosi gbaru bu enine owhnurninya."*

Nye naagba

iyinya abochna

11 M whnuru m oligwe kpumernu nu otu iyinya abochna, rewhna nye zi n'olu a bu Nye Okwnata Ovu nu Nye Ezi Oka. O ji ikpe buru oma neekpe ikpe, nolu ogwnu.

12 Anya a lawuru nu lele riro bekwnu, o kpu agida okpu-eze nu risi a. O nwernu rewhna be gbakwasiri a ke o za nye magwu, okwolem ya magwu nhne o bu.

13 Iwo o wogwu bu ke be tururu n'ovnarna, be noosukwu a Ikwu-Onu Chiokike.

14 Ele ogwnu ke oligwe sno a n'aznu n'olu iyinya abochna woru iwo abochna marnu mma.

15 Ama-ogwnu zi buko hi n'onu a nowhuya, ke o ji neemegbu kpakara mba. "O jeeji mkpara rugwe neechi be."† O nozosna manya ke okne ovu owe ehni Chiokike ke Meli Nhne Dum.

16 Be gbakwasiri n'olu iwo a ma nu ochi a rewhna,
"EZE KAKWO ELE EZE NU
NYENWE KAKWO ELE NWE."

17 M whnu otu enine izi gwuzo n'ehnam, o ji okne nkoli si okokoba, kanu kpakara onunu oligwe, "Anu va gbako n'okne iriri Chiokike.

* 19:10 ke neeyinu ele badnu aka kpo okwo ikwu-onu Chiokike.

† 19:15 Eri Oma 2:9

18 Anụ va ri anọ-ẹhni ele eze, nụ ke ele risi ọgwu, nụ ke ele dikne, nụ ke ịyinya nụ ke ele gba be, nụ anọ-ẹhni kpakara ele badnụ, ma ọhi nụ ke ele bụo ọhi, nye kwu nụ nye matị.”

19 M whnụ anọhia wam nụ ele eze ke ọwa nụ ele ọgwu be gbakọru n'otu ma be lusi nye wam dazị n'olu ịyinya ọgwu ya nụ ele ọgwu a.

20 Kọvu be nwudnenu anọhia wam ya nụ nye ọwhnurninya aghalaghala wam nye rnurnu ẹnu ndu-ẹhni wam nụ ruwhnu a, nye ji ẹnu ndu-ẹhni wam rnawhu ele nwernu akara anọhia wam nụ ele kponnu igbudu anọhia wam risi ẹli. Anọhia wam nụ nye ọwhnurninya aghalaghala wam, be túbna be nụ bụdu nụ rime olulu bẹkwu ji rugwu bẹkwu neerne.

21 Be ji ama-ọgwu neehi n'ọnu nye wam dazị n'olu ịyinya wam gbu kpakara ele ọgwu be, ọnnu oligwe rijiri rụwho hite n'anọ-ẹhni be.

20

Otu pokwu awha

1 M whnụ otu enine izi hi n'oligwe neehiedna, o ji snambị ọnuhna olulu awhnụwhnu, ji masị ijigba hna okpotokpo n'aka a.

2 Ọ nwudne agwọ wam, bụ agwọ gbaka wam, nye bụ Ekwensu, nụ Setani kne a eriri otu pokwu awha.

3 Ọ túbna a nụ rime olulu awhnụwhnu, kasnị a akara, ma ọ gharu o duwhu kpakara mba berere tem otu pokwu awha wheme. Omekwo, be jọtoma a eriri ige matị.

4 M whnụ agida ngadna eze, be nyee ele dazị n'olu be rikne be jeeji kpe ikpe. M whnụ mkpuru

ovu ele be gburu kwnornu akebne be gbannu Jizosi nu ikwu-onu Chiokike, ele kpola risi eli nyee anohia wam, mọbu igbudu a, mọbu nahoru akara a n'egedege ruwhnu be, mọbu n'aka be. Be ziri budnu snornu Karaisi neechi otu pokwu awha.

⁵ (Ele berere ke nwurnu onwu lizola n'enwu tem otu pokwu awha wheme.) Ka bu olizo n'enwu ke mbom.

⁶ Chiokike joggozi ele ke a, ele jeekehia igwe n'olizo n'enwu ke mbom. Enwu ke gba lawuru jeenwe rikne n'ehni be. Be jobu ele okwa ariohna Chiokike nu ke Karaisi, be joosno a chi otu pokwu awha.

O megburu Setani

⁷ Nga otu pokwu awha whemernu, be jotoma Setani, o whuya n'ikelu a.

⁸ O jowhoga duwhu agida mba ke gbasaru nu nkala eno ke owa, Gogi, nu Magogi, chikota be zne ogwnu. Onu ogwnugwnu be hna lele rizna zi nu ngeri osimini.

⁹ Be gbasa kpakara owa, gahnata gburugburu hne ele nsọ zi, nu eli-ohna wam Chiokike whnurnu n'anya, kovu bekwnu hiri n'oligwe dna rnegbu kpakara be.

¹⁰ Be tubna Ekwensu wam, nye duwhuru be nu rime olulu bekwnu be ji rugwu bekwnu neerne hne anohia wam nu nye owhnurninya aghalaghala wam zi. Be jaata be awhnwhnu iwhnehnie nu abali hna okwnukokwnu.

Ikpe ipne-aznu

¹¹ M whnụ otu ngadna eze abochna okpotokpo, nụ nye dazị n'olu a, ọwa nụ oligwe gbawhuru nụ ruwhnu a, be whnuna be berere.

¹² M whnụ ele nwurru ọnwu, ele kwu nụ ele matị, gwuzo nụ ruwhnu ngadna eze wam. Be kpume agịda ọkwukwo, be kpume kwno ọkwukwo berere, ke bu ọkwukwo ke budnu. Chiokike kpe ele nwurru ọnwu ikpe hite nụ nhne be gbaru n'ọkwukwo wam lele kpa ọnwu be jiri ziri.

¹³ Osimini gwehia ele nwurru nụ rime a, ọnwu nụ eli ọnwu gwehia ele zị nụ rime be, be kpe nye ọbula ikpe lele kpa ọnwu ọ nwurru jiri ziri.

¹⁴ Be tubna ọnwu nụ eli ọnwu nụ rime olulu bekwu. Olulu bekwu ka bu ọnwu ke mgbalawuru.

¹⁵ Nye ọbula ke be gbala ọwhna a nụ rime ọkwukwo ke budnu, be tubna nụ rime olulu bekwu.

21

Oligwe ikne nụ ọwa ikne

¹ Omekwo, m whnụ oligwe ikne nụ ọwa ikne, kwnornu nụ oligwe ke mbom nụ ọwa ke mbom gawheru, osimini zima masi.

² M whnụ eli-ọhna nsọ wam, Jeruselem ikne, hi n'oligwe hne Chiokike zị neehiedna, be jiknenu a lele nnwerne ikne naalakwnusi nzi a.

³ M wurru m okne nkoli hi nụ ngadna eze wam nookwu ọka, kaa, “Le, Oro Nsọ Chiokike zị n'esilawuru rumu badnu, Chiokike jaadazinu be, be jobu ele ke a, ọ jobu Chiokike be, dazigidnenu be.

⁴ O jookwnosnama kpakara anya-mini n'anya be, ọnwu jáazima, mọbu ọgba mkpe, mọbu ọkwna

ẹkwana, nhne igbugbu jáazịma, kwnornu nụ nhne ọknani gawhelem.”

⁵ Nye wam dazị nụ ngadna eze wam, kaa, “Le, m neeme kpakara nhne bụru nhne ikne.” Ọ kanụ m, “Gba nhne ka n'ọkwukwo, kwnornu nụ ikwu-ọnu ka bụ ezi ọka ke kwesiri ọkwnata ovu.”

⁶ Ọ kanụ m, “Be menem a. Mawa bụ Alifa nụ Omega, Ọpanizo nụ Okwukwo. Nye ọbula akpịri nọokpo bẹkwu, m jeenye a mini ke hi nụ risi mini ke bụdnu n'etekne.

⁷ Nye megburu, jeekehia kpakara nhne ka, m jọoburu Chiokike a, ọ jọoburu nnwọ m.

⁸ Kọvu ele ogwnu nụ ele kwé ekwe, nụ ele ruru ọru, ele noogbu badnụ, nụ ele neeme ọyi, nụ ele amusu, nụ ele naakwa rẹnwu, nụ kpakara ele aghalaghala jeekehia igwe nụ rime olulu bẹkwu ji rugwu bẹkwu neerne. Ka bụ ẹnwu ke mgba lawuru.”

Jeruselem ikne

⁹ Otu n'esilawuru ele enine izi ẹsau wam vu obele awhnụwhnu ipne-aznụ wam vakwnusi m, kaa, “Vaa, m jeegesi i nnwerne be nọolu ikne, bụ nnwerne Nnwọ Atnuru wam.”

¹⁰ O vuru m n'Enine zne n'olu okne rugwu zị n'olu, gesi m ẹli-ọhna nsọ wam, bụ Jeruselem hi n'oligwe hne Chiokike zị neehiedna.

¹¹ O vu igwugwu Chiokike, noonwu lele akaworugwu zị okne ọnu ahia, lele jasipa, ziri snam lele nyo.

¹² O nwernu mkpọ be turu a hna n'olu, o nwernu nri nụ ọnuhna lawuru, nụ nri enine izi lawuru neese ọnuhna. Be gbasiri rẹwhna nri nụ avnuru lawuru rumu Izireli n'ọnuhna a.

13 Ọnuhna ẹto zị n'ọbosi ẹhnam, n'olu olu ọnuhna ẹto, n'ẹli ẹli ọnuhna ẹto, n'ọdidna ẹhnam, ọnuhna ẹto.

14 Mkpọ ẹli wam nwernu ntụ-ẹli n'olu nri nụ akaworugwu lawuru, hne be gbakwasiri ẹwhna ele izi nri nụ ẹbo ke Nnwọ Atnuru wam.

15 Nye wam naakanu m ọka ji otu nhne golu be neji nọotu nhne, nọotu ike ẹli-ọhna wam, kpakara ọnuhna a, nụ ẹhni mkpọ a.

16 Ẹli-ọhna wam hna n'otu. Ogologo a nụ rude a hna n'otu. O gweru nhne be tų nhne tų ẹli-ọhna wam, ọ tųhia otu pokwu nụ riwhu maịli ẹno, ogologo a, nụ rude a, nụ olu a, hna n'otu.

17 O tų ẹhni mkpọ wam, tųhia riwhu rula lawuru, lele kpa ọtutu ke badnụ jiri zị, ke enine izi ji nọotu.

18 Ẹhni mkpọ wam bụ jasipa, ẹli-ọhna wam bụ golu zị snam, lele nyno.

19 Be ji agida akaworugwu zị okne ọnu ahia mee ntụ-ẹli mkpọ ẹli-ọhna wam mma. Ntụ-ẹli ke mbom bụ jasipa, ke ẹbo bụ safia, ke ẹto bụ kasidoni, ke ẹno bụ emiradi,

20 ke isne bụ sadonisi, ke isunu bụ kanelia, ke ẹsau bụ kirisoliti, ke ẹsato bụ berili, ke tolu bụ topasi, ke nri bụ kirisopasisi, ke nri nụ otu bụ jasinti, ke nri nụ ẹbo bụ ametisi.

21 Nri nụ ọnuhna lawuru wam bụ palị nri nụ ẹbo, otu ọnuhna otu palị. Ogodo apna ẹli-ọhna wam bụ golu zị snam nọowhnu ọsno lele nyno.

22 M whnuna m Oro Nso n'ẹli-ọhna wam, kwnornu nụ Nyenwe aị Chiokike ke Meli Nhne Dum nụ Nnwọ Atnuru wam bụ Oro Nso a.

23 Mkpa ẹhnam mọbu ẹnwa zá naakpa a, be zá nọomu nụ rime a, kwnornu nụ igwugwu Chiokike nọomu nụ rime a, Nnwọ Atnuru wam bụ iwhe a.

24 Ele mba ke ọwa jeezne izne n'iwhne a, ele eze ke ọwa jeegweya igwugwu be nụ rime a.

25 Be jáagbasni ọnuhna ẹli wam, o jeegberu anya kwnornu nụ ọchichiri zila nụ rime a.

26 Be jeegwebnanya nhne igwugwu nụ ọson'anya kpakara mba nụ rime a.

27 Nhne ọbula ke zila richna jáabna nụ rime a rịa rịa, mọbu nye ọbula ke neeme nhne ruru ọru, mọbu nye aghalaghala, okwolem ele be gbarụ rẹwhna be nụ rime ọkwukwo ke bụdnu ke Nnwọ Atnuru wam.

22

Mini ke bụdnu

1 Enine izi wam gesi m osimini ke bụdnu noonwu lele nyno, hi nụ ngadna eze Chiokike nụ ke Nnwọ Atnuru wam naagbahia.

2 Naagbawhe n'esilawuru ogodo apna ẹli-ọhna wam, nụ ngeri lawuru mini wam isisi ke bụdnu zi, ke naami nri nụ mgba mkpuru lawuru n'awha ke bu otu mgba n'enwa. Ọkwukwo isisi wam bu nhne be ji nọogwo ẹhni igbugbu ele kpakara mba.

3 Ọvu ọnu zima rịa rịa. Ngadna eze Chiokike nụ ke Nnwọ Atnuru wam jaazi n'ẹli-ọhna wam, ele izi a jeeznenụ a izi.

4 Be jọowhnu ruwhnu a, rẹwhna a jaazi n'egedege ruwhnu be.

5 Abali jáazima berere, be jọomu tọnji, ẹnam jọomu, kwnornu nụ Nyenwe a Chiokike jeenye be iwhne, be jechi lele eze tim tọm.

6 Enine izi wam kanu m, "Ikwu-ọnu ka bu ezi ọka ke kwesiri ọkwnata ovu. Nyenwe a Chiokike ke enine ele ọwhnurninya ziyaru enine izi a gesi ele

izi a kpakara nhne jeemeriri n'ige matị vazne nụ ruwhnu.”

Jizọsi vawa

⁷ “Le, m vawa wara wara, ngozi jaazinu ele jaabita ikwu-ọnu ọwhnurninya ke ọkwukwo ka.”

⁸ Mawa, Jọni, nurnu, whnu masi kpakara nhne ka. Nga me nurnu, whnu kwo masi, m dna n'eli n'ochi enine izi nye gesiri m kpakara nhne ka ma m kponu m a risi eli.

⁹ Kọvu ọ kannu m, “I mee kpam, m bu m nye izi ibne i, nu ke rumu nda i ele ọwhnurninya, nu kpakara ele jaabita ikwu-ọnu ọkwukwo ka. Kponu Chiokike risi eli.”

¹⁰ Ọ kanu m, “I tuga ikwu-ọnu ke ọkwukwo ọwhnurninya ka, kwnornu nu ige zi ndundu.

¹¹ Nye ojo mernu nhne ojo a zne ruwhnu, nye zila richna, ọ zila richna a zne ruwhnu, nye mee mma, mernu mma a zne ruwhnu, nye zi nsọ, ziri nsọ a zne ruwhnu.”

¹² “Le, m vawa wara wara, ọgwo ọnu m zi m n'aka, m jeenye nye ọbula lele kpa ọnu a jiri ziri.

¹³ Mawa bu Alifa nu Omega, Nye Mbom nu Nye Ipne-aznu, Ọpanizo nu Okwukwo.

¹⁴ “Ngozi jaazinu ele snurnu iwo awura be, be nwernu rikne o ri mkpuru isisi ke budnu wam, be jeehi n'ogodo ọnuhna bnazne nu rime eli-ọhna wam.

¹⁵ Kọvu rumu nkita, nu ele amusu, nu ele neeme ọyi, nu ele noogbu badnu, nu ele naakwa renwu, nu ele whnurnu aghalaghala n'anya neeme be jaazi n'ederezi.

¹⁶ “Mawa Jizọsi, ziyaru enine izi m ọ gba akebne kpakara nhne ka nu rime kpakara ọgbako

Chiokike. Mawa bu Mgbaregwugwu nu Nnwọ Devidi, Mbọ ọsisi marnu mma.”

¹⁷ Enine Nso nu nnwerne ikne karu, “Vaa.” Nye obula ke nurnu, kaa, “Vaa.” Nye obula akpiri nọokpo bekwu, vaa, nye o masiri gweru mini ke budnu n'etekne nworu.

¹⁸ M nodo nye obula ke nurnu ikwu-onu ke okwukwo owhnurninya ka aka nu nsni, nye obula ke tukwasiri nhne n'olu a, Chiokike jootukwasinu a nhne nu kpakara awnwhnu be gbaru n'okwukwo ka.

¹⁹ Nye obula ke gwemernu nhne n'ikwu-onu ke okwukwo owhnurninya ka, Chiokike jeegweme igwe a n'isisi ke budnu nu eli-ohna nsọ, ke bu nhne be gbaru n'okwukwo ka.

²⁰ Nye gbaru akebene kpakara nhne ka karu, “Owe, m vawa wara wara.”

Amim. Vaa, Nyenwe a Jizosi.

²¹ Oru ke Nyenwe a Jizosi dazinu kpakara anu. Amim.

Tesitamenti Ikne n'O_{nu} Ikwere **New Testament in Ikwere**

copyright © 2010 Wycliffe

Language: Ikwere

Translation by: Wycliffe

Ikwerre - (ikw) Nigeria

The Iwerre language of Nigeria can also be spelled Ikwere and Ikwerri. This language is spoken primarily by the Ikwerre people who live in the Rivers State of Nigeria and is one of the many ethnic groups in the Niger Delta. There were more than 23,000 speakers of this language in 1973. There is also a considerable local interest in literacy and grammar.

Copyright Information

© 2010, The Nigeria Bible Translation Trust. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789076369

New

The New Testament

in Ikwere

© 2010, The Nigeria Bible Translation Trust.
All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files dated 29 Jan 2022

c17ee3a1-1c7a-5c05-8e0f-5043e8228d89